

## **Naqqiut**

Akissuteqaat 29. oktober 2018-imeersoq taarserpaa

(Ilaqutariit nukittorsarumallugit ilaqutariinnik siunnersuisartut pillugit apeqquteqaat aallaavigalugu oqallinnissamik siunnersuummut akissuteqaat naqqinneqarpoq. Pingaarnertut naqqiinerit allassimaneranik aaqquissuussinerupput. Tusaannga pillugu immikkoortumik ilanngussisoqarpoq.)

## **Ilaqutariit nukittorsarumallugit ilaqutariinnik siunnersuisartut (coaching) pillugu apeqquteqaat aallaavigalugu oqallinnissamik siunnersuut**

(Inatsisartunut ilaasorta, Nivi Olsen, Demokraatit)

### **Akissuteqaat**

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Apeqquteqaat aallaavigalugu oqallinnissamik siunnersuummut saqqummiunneqartumut Naalakkersuisut qujapput.

Ilaqutariit qaninnerpaamik nukittunerpaamillu ataatsimoorfigigivut siunnersuuteqartoq Naalakkersuisut isumaqatigaat.

Ilaqutariinnut pitsaanerpaamik tunngavissiinissatsinni pitsaanerpaamik pilersitsinissamik ilaqutariinnullu atugarliortunut pisariaqartumik iliuseqarsinnaanerput, uagut naalakkersuineramik suliaqartut tapersersuinissarput pingaaruteqarpoq. Taamaalillutimmi ilaqutariit toqqissimasut ingerlalluartullu meerartatsinnut tunngavissiilluarnermikkut meeqqat peqqilluurlutik nukittullutillu peroriartornissaannut qulakkeerinnittuupput.

Ilaqutariittut inuunerup pingaaruteqassusaa pillugu Naalakkersuisut ilisimaarinnipput. Taamaammat Naalakkersuisut ilaqutariinnut politikeqarnissamik sulissuteqarput. Taamatut politikeqarnermi ilaatigut suliniutit tamarmik meeqqanut inuusuttunullu tunngassuteqartut ilaqutariinni aallaaveqartinnissaat qulakkeerineqassaaq. Ilaqutariinnut ataatsimoorfiusumik politikeqarneq aamma naalakkersuinnikkut suliaqarfiit assigiinngitsut akornanni suliniutit ataatsimoorfiunissaannik qulakkeerinniffiususaaq. Ilaqutariittut inuunermi assersuutigalugu makku aamma pineqarput: inissaqarneq, ilinniagaqarneq, suliffeqarneq peqqissuunerlu.

Ilaqutariit aallaavigalugit sulineq aallartereernikuuvoq aamma ilaqutariit pillugit periusissiaq suliarineqaleruttorpoq.

Peqqinnissaqarfimmi pikkorissartitsisarnermi MANU pigineqarpoq. Pikkorissartitsisarnermi ilaqutariit tamarmik qitornartaartussat saaffigineqarput. Angajoqqaanut pikkorissartitsisarneq inersimasunut perorsaannikkut neqeroorutaavoq, tassanilu angajoqqaat ukkatarineqarput. Nutaanik ilisimasaqalersarput, misilittakkaminnik avitseqatigiissinnaapput, namminnerlu meerartik ilanngullugu pitsaasumik patajaatsumillu inuuneqalernissaminnut tapersersorneqarlutik. Angajoqqaat angajoqqaatut pisussaaffimmini nukittunerulernissaat siunertarineqarpoq, meeqqat taamaalillutik toqqissillutik peroriartorsinnaaqqullugit.

Periaatsip siammarternissaanik piviusunnortinnissaanillu Isumaginninnermut Aqutsisoqarfik suliaqarpoq: Ilaqutariinni aqutissioqatigiinneq. Ilaqutariinni aqutissioqatigiinneq periaasiuvoq inunnik isumaginninnikkut sulinermi atorpeqartoq, ilaqutariillu tamarmiusut sullinniarnearput. Periaaseq oqaloqateqartarnermik aallaaveqartoq, inunnillu meeqqap nukinnik aallerfigisaanik ukkatarinnittoq. Taamaalilluni ilaqutariit taakkualu attaveqarfii peqatigalugit meeqqap ikiorneqarnissaanut qanoq iliortoqarsinnaanersoq pilersaarusiussapput.

Meeqqanut, inuusuttunut ilaqutariinnullu suliaasaqarfinni ilaqutariinnut sammititsisumik ukkatarinninnerup saniatigut pitsaaliuinnermut suliniutit aamma pitsaanerulersissavagut. Pitsaaliuinnermik siusissumillu suliniuteqarnermik annertuumik suliaqartoqareerpoq. Assersuutigalugulu Isumaginninnermut, Ilinniartitaanermut aamma Peqqissutsimut Aqutsisoqarfiit akornanni suliaasaqarfiit assigiinngitsunik suliallit akornanni suleqatigiinneq ingerlanneqarpoq. Meeqqat inuusuttullu tamarmik atugarissaarlutik ineriartorlutillu pitsaasumik inuuneqarnissaannut suliaasaqarfiit pingasut assigiinngitsut akornanni suleqatigiinneq ukkanneqarpoq.

Tusaanngap pilersinneqarneratigut oqarasuaatikku siunnersuisarfiit tamarmik ataatsimoortinneqalerput. Ajornartorsiutinut assigiinngitsorpassuarnut, soorlu angerlarsimaffimmi ajornartorsiutinut, isumassuinissamik sumiginnaaneq aamma angajoqqaat imigassartortut pillugit, imminut toqunnissamik eqqarsateqarnernut nakuusernnullu atatillugu Tusaanngami siunnersuisoqarsinnaavoq. Tassani innuttaasoq kinaluunniit aamma ilaqutariit kikkulluunniit siunnersortinniarlutik saaffiginnissinnaapput.

Taamaalilluni sullinniakkanut amerlasuunut aamma ilaqutariinnut ajornartorsiunngitsunut ukkassilluni suliniutit maannakkut ingerlasut arlaqarput. Kommunini ilaqutariinnut sullissiviit arlallit ammasumik siunnersuisarnerat aamma taassallugu pingaartuusoraara. Taamaalilluni ilaqutariit innersuunneqaratik takkussinnaapput siunnersorneqarlutik ilitsersuunneqarlutillu.

Nunatsinni ilaqutariinnut tamanut pitsaasumik tunngavissiiinissaq qulakkiissallugu ukkatarisariaqarparput. Taamaaliorpugut ilaatigut meeqqanut, inuusuttunut ilaqutariinnullu suliaasaqarfinni siusissukku suliniutit pilersinnerisigut patajaallisarnerisigullu. Pitsaaliuilluni sulinerup ilaatut ilaqutariinnik ilitsersuinerup atornissaa pillugu isumassarsiaq soqutiginarpoq, ilaatigut pissutigalugu najukkami isumalluutit aallaavigeqarnissaat siunnersuummi ukkanneqarmat. Taamaattorli peqatigitillugu pingaaruteqarpoq ilaqutariit nalinginnaasut isumaginninnermi sullitanngortinneqassanngimmata.

Inuit najukkami ilaqutariinnik maannamut suliaqareersut piginnaaneqarnerisa nukittorsarnerisigut atortut pitsaanerpaamik atorsinnaagivut Naalackersuisut isumaqarput. Ullumikkut suliamik ilinniarsimasut eqqortumik perorsaaneermut tunngasunik piginnaasallit sulisussarsiarinissaat ajornakusoorpoq. Ilaqutariinnik ilitsersuisutut suliamik ilinniarsimasut sulisussarsiarinissaannut periarfissat killeqartut tamatuma aamma nammineq ersersippaa. Saniatigut suliaasaq ilaqutariinnut sapinngisamik pitsaanerpaamik tapersersuinnermik pilersitsisinnaavoq, ullumikkut ikiorsiinissamut periarfissat pigineqartut aqqissuuteqqinnerisigut aqqinneqarsinnaagunarluni. Taamatut siusissumik pitsaaliuinnermillu suliniuteqarneq nangillugu ukkatarissavarput. Taamaalilluta kommunini, peqqinnissaqarfimmi, ullukku paaqqinnittarfinni, atuarfinni il. il. sulisut pisariaqartumik ilisimasaqarnissaat aamma unammilligassat paasinissaannut aamma atugarliornerit paasinissaannut eqqortumik sakkussaqaarnissaat kiisalu tamanna tunngavigalugu iliuseqaarnissaat qulakkiissavarput.

Taamatut oqaaseqarlutik pissarsiffiusussamik pitsaasumillu oqallittoqarnissaanut Naalackersuit qilanaarput.